

Parlamentario mr. Xiomara Ruiz-Maduro (Fraccion MEP):

Gabinete Eman mester a explora otro opcionnan pa ubica e Hospital nobo

Teniendo debido cuenta cu calamidad y trafico

DURANTE e debate publico riba e renobacion y ampliacion di nos Hospital a sali na cla cu Gabinete Eman a scoje pa laga e Hospital na e luga existente sin tene debido cuenta cu e accesibilidad ora cu calamidad presenta y tambe cu e trafico congestionta riba e rutanen cu ta conduci na nos Hospital. Un Gobierno responsabel lo a tene debido cuenta cu calamidad y e trafico y lo a explora otro opcionnan pa e ubicacion di nos Hospital.

Nos a yega di experiencia na nos Pais cu ora tin awasero fuerte, e area rond di nos Hospital ta bay bou di awa y ta haci cu e Hospital ta bira dificilmente accesibel hasta pa ambulance. Si na nos Pais presenta un situacion di mal tempo na unda cu olanan grandi subi tera, e proximidad di nos Hospital na nos beachnan tambe lo dificulta e accesibilidad di nos Hospital. Podise hopi no ta imagina nan mes un calamidad asina, pero naturalesa a demostra nos poco tempo pasa su forsa di destruccion na New York, na unda tampoco por a pensa algo asina. Pesey di un inversion cu lo costa nos Pueblo 1.000.000.000 florin, nos Gobierno mester tabata prudente suficiente y laga Rampenbureau traha un rapport pa muestra Pueblo si e ubicacion di e Hospital ainda ta esun ideal teniendo cuenta cu calamidadnan cu por presenta. Pa locual ta e trafico, nos por a tuma nota cu Gobierno a sali for di e punto di salida cu e Hospital ta accesibel den 18 minuut for di San Nicolas. Gobierno a tuma e conclusion aki for di e rapport Commissie Ziekenhuis 2002, cu e tempo ey a premira cu nos Pais na 2015 lo tin 97.000 hende y cu ta tuma e ambulance 18 minuut

di IMSAN pa yega na Hospital na Eagle. Pero e realidad ta cu nos Pais ta conta desde october 2012 cu 114.085 hende y cu mas di 60.000 auto riba nos careteranan y pesey e trafico na nos Pais riba cualkier ora di dia ta basta congestionta. Especialmente L.G. Smith Boulevard na altura di Parlamento bay direccion di e hotelnan ta basta congestionta y cu e bendita di e tram den Centro di Oranjestad, ta pio e situacion den trafico lo bira. E otro ader pa yega nos Hospital, cual ta e caminda di Paradera direccion Tanki Flip y Pos Abou tambe ta basta congestionta. Pesey e ta incomprendibel con Gobierno hunto cu e team di architectnan y tambe infrateam por a yega na e conclusion cu e Hospital ainda ta accesibel den 18 minuut manera premira den e rapport di 2002 y cu pa e motibo aki e ubicacion existente ta e miho opcion pa nos Hospital. Un Gobierno responsabel lo a tene

debido cuenta cu e retonan di calamidad y e trafico y lo a explora otro opcionnan pa e ubicacion pa nos Hospital. Lamentablemente Gabinete Eman ademas di no a explora otro opcionnan pa e localidad di nos Hospital, tampoco no por a presenta un rapport di Rampenbureau y tampoco un estudio di trafico cu ta hustifica e ubicacion existente pa nos Hospital. E hustificacion

cu Gabinete Eman a duna, ta cu e lo ta un molester y tambe costoso pa laga e specialistanan medico cu tin nan consultorio den cercania di Hospital muda for di e sitio. Tambe cu lo tin un costo di 35.000.000

florin si mester muda e kabelnan di util-

idad di nos Hospital. Pa esaki mester remarca cu den e masterplan di Hospital, e specialistanan lo tene nan consultorio den Hospital mes, dus di tur manera na fin di dia e oficianan di especialista lo desaparece y haya otro destino. Pa locual ta e gastonan miyonario di cablenan di utilidad, esaki por a wordo cubri cu e 40.000.000 florin cu Gabinete Eman a haya door di a traspasa e edificio di Hospital pa SOGA.

Pues asina ta bira bisto cu Gabinete Eman no por hustifica e fayto di a keda sin explora otro opcionnan pa ubica nos Hospital, teniendo debido cuenta cu calamidad y trafico.

